

Si Kristo No a Resusitá...

Un di e diferensianan prinsipal entre Kristo i fundadónan di otro religionnan ta ku graf di otro líderman spiritual ta okupá. En kontraste, graf di Hesus ta bashí! Di bèrdat, kristianismo ta basá riba e ún echu historiko aki! Pensa un ratu tokante e importansia di e resurekshon. Kiko si Hesus NO a resusitá?

1. Si Kristo NO a resusitá, E ta un gañadó. Bes tras bes Hesus a bisa ku E lo resusitá (Mateo 12:40; 16:21; 17:9,23; 20:19; 26:32; 27:63). Si Hesus no a resusitá, òf El a gaña, òf tabata malamente kiboká.

2. Si Kristo NO a resusitá, Hesus no por ta Dios. Hesus a wòrdu krusifiká pasobra El a bisa ku E ta Dios (Yu di Dios). Segun Romanonan 1:4, Dios Tata a resusitá Hesus probando ku E ta Dios! Si bo tabata Dios Tata i un gañadó a bisa ku e ta Dios i e lo proba esei dor di resusitá despues di muri, lo bo resusit'é? NUNKA! Ma Dios Tata a resusitá Hesus pa proba ku E ta Dios.

3. Si Kristo NO a resusitá, kristiannan ta reuní riba e dia robes. Ningun teksto den Beibel ta eksigí pa reuní djadumingu. Ma e apòstelnan (hudiunan, ku tabata konvensé ku djasabra ta e dia ku Dios a fiha) a kuminsá reuní riba e promé dia di siman pasobra esei ta dia ku Hesus a resusitá i aparesé na nan. P'esei tambe nan a yama djadumingu "*dia di Señor*" (Revelashon 1:10).

4. Si Kristo NO a resusitá, Beibel ta un Buki inkonfiabel, yen di mentira. Tèstament Bieu a profetisá ku e Mesias lo resusitá. Pues, e partinan ei di Beibel ta gaña si Kristo ta den graf ainda. E evangelionan ta konta di Su resurekshon. Mester deshasí di e bukinan ei tambe. I sobrá di Tèstament Nobo ta storianan i siñansa di hende ku a gaña tokante e resurekshon. Pues eseinan tambe ta inkonfiabel si Hesus no a resusitá.

5. Si Kristo NO a resusitá, anto ta mentira pa bisa ku El a hiba un bida sin piká. Si Hesus no a resusitá, ta opvio ku E tabata un hipókrita, un mentiroso kampion. Si esei ta e kaso, E ta un pekador, meskos ku tur otro hende. I pió ainda, E ta un pekador krue, pasobra El a indoktriná Su siguidónan asina bon ku nan a muri pasobra nan a kere Su mentira.

6. Si Kristo NO a resusitá, E no a subi bai shelu lo no regresá pa esnan ku a konfia den djE. Promé ku El a muri, El a bisa "*Mi ta bai prepará un lugá pa boso. I ora Mi bai i prepará un lugá pa boso, lo Mi bin atrobe i risibí boso serka Mi, pa kaminda Ami ta, boso tambe por ta*" (Juan 14:2-3). Kon Hesus por bai i regresá pa si E ta den graf?

7. Si Kristo NO a resusitá, anto esun ku a konfia Kristo pa salbashon lo no ta kun'E pa tur eternidat. Beibel ta bisa ku esnan ku ta konfia Kristo pa salbashon "*...lo ta semper ku Señor*" (1 Tesalonisensenan 4:17). Si Hesus ta den graf, e palabranan ei lo nifiká solamente ku nos lo ta morto méskos kun'E. Ki speransa esei ta?

Ma Beibel ta bisa, "*Esun ku tin e Yu (Hesus) tin e bida, esun ku no tin e Yu no tin e bida...*" (1 Juan 5:12). Tantu bal pa hende aseptá e Yu di Dios morto? Un morto no por salba! Ma Hesus por skapa for di fièmu tur esnan ku ta konfia den djE pasobra E ta bibu awe!

8. Si Kristo NO a resusitá, anto ta ridíkulo pa biba un bon bida. Maske ta difisil, nos ta lucha pa stima nos enemigu-nan, ehersé kontrol propio, pordoná, èts. entre otro pasobra un dia nos tin ku duna kuenta na Hesus (Echunan 10:42). Ma si Hesus no a resusitá, mihó nos djòdjò, fiesta, gosa awor, pasobra ta durante e bida aki so ku bo tin chèns di gosa.

Nos por trese dilanti hopi otro implikashon si Kristo no a resusitá. Ma echu ta, **Kristo A resusitá i ta biba AWE! P'esei bo tin ku ahustá bo bida na e bèrdatnan aki.** E resurekshon ta sumamente importante. Si Kristo no a resusitá, nos tin nèt NADA!